

IMF unjur ekonomi serantau tumbuh 6% tahun ini
Utusan Online
28 April, 2012

KUALA LUMPUR 27 April - Tabung Kewangan Antarabangsa (IMF) mengunjurkan ekonomi serantau tumbuh enam peratus pada tahun ini dan 6.5 peratus pada 2013.

Bagaimanapun, IMF di dalam 'Tinjauan Masa Hadapan Ekonomi Serantau' nya menjangkakan pembuat- pembuat dasar dari rantau ini bakal berdepan dengan cabaran untuk menyesuaikan polisi bagi terus menyokong kestabilan pertumbuhan.

Pengarah Jabatan Asia dan Asia Pasifik IMF, Anoop Singh berkata, Asia akan terus menikmati permintaan domestik yang baik di sebalik kelemahan ekonomi global yang dapat disaksikan menerusi penurunan kadar pengangguran serta peningkatan pertumbuhan kredit di rantau ini.

Namun begitu, kadar inflasi dijangka meningkat di beberapa buah negara manakala aliran masuk modal ke negara-negara berkembang pesat seperti China dan India kembali pulih setakat ini.

"Negara-negara berkembang pesat kekal menjadi ekonomi yang tumbuh paling pantas di dunia, diterajui oleh China dan India, masing-masing sebanyak 8.25 peratus dan menghampiri tujuh peratus tahun ini.

"Risiko yang mengancam pertumbuhan Asia datang dari luar rantau ini antaranya kemeruapan di dalam modal, ketidaktentuan harga komoditi serta aliran modal," katanya semasa sidang akhbar sempena pelancaran 'Tinjauan Masa Hadapan Ekonomi Serantau' bagi Asia dan Asia Pasifik di sini hari ini.

Tambah Anoop, peningkatan krisis di Eropah secara terangan memberi kesan terhadap Asia dengan menyebabkan kemeruduman di dalam eksport ke negara-negara maju serta pengeluaran semula aliran modal asing dari rantau Asia.

Dengan itu beliau menyarankan pembuat-pembuat dasar di rantau ini bersedia untuk memulakan polisi yang lebih ketat untuk mengekang tekanan ekonomi yang tumbuh terlalu tinggi.

Krisis ekonomi Eropah yang diramalkan lebih teruk berbanding sebelumnya mampu menyebabkan pertumbuhan ekonomi Asia merosot sebanyak dua hingga lima peratus.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0428&pub=Utusan_Malaysia&sec=Ekonomi&pg=ek_01.htm